


Nedim Tuno, Jusuf Topoljak, Admir Mulahusić

MONOGRAFIJA „50 GODINA ODSJEKA ZA GEODEZIJU I GEOINFORMATIKU GRAĐEVINSKOG FAKULTETA UNIVERZITETA U SARAJEVU“



Univerzitet u Sarajevu – Građevinski fakultet objavio je monografiju pod naslovom „50 godina Odsjeka za geodeziju i geoinformatiku Građevinskog fakulteta Univerziteta u Sarajevu.“ Knjiga je štampana u boji, na kvalitetnom papiru i tvrdog je uveza. Sastoji se od 296 stranica, a dodijeljen joj je ISBN 978-9958-638-74-9. Važna 50. godišnjica pokretanja studija geodezije na Građevinskom fakultetu Univerziteta u Sarajevu (GF UNSA) potakla je mali tim profesora sa Odsjeka za geodeziju i geoinformatiku GF UNSA da napišu prikladnu monografiju, kojom bi se adekvatno obilježio ovaj veliki jubilej.

Današnji Odsjek za geodeziju i geoinformatiku je izrastao iz Katedre za geodeziju, formirane na Građevinskom fakultetu 1961. godine, a koja je nastala iz Geodetskog kabineta ustanovljenog na Tehničkom fakultetu u Sarajevu davne 1949. godine.

Univerzitetski studij geodezije u Sarajevu, pokrenut 1973. godine na Geodetskom smjeru Građevinskog fakulteta, bio je četvrti u bivšoj Jugoslaviji, nakon što je takav studij ranije ustanovljen u Zagrebu, Ljubljani i Beogradu. S punim pravom se može reći da je Građevinski fakultet Univerziteta u Sarajevu putem svoje Katedre za geodeziju (kasnije Odsjek za geodeziju, odnosno Odsjek za geodeziju i geoinformatiku), kroz proteklih pet desetljeća odigrao izuzetnu ulogu u sveukupnom razvoju geodetske profesije u Bosni i Hercegovini, uspješno realizujući važan zadatak stvaranja neophodnog visokostručnog i istraživačkog kadra. Prilagođavajući se modernim trendovima i uključujući u nastavu najnovija tehnološka dostignuća u polju geodezije i geoinformatike, omogućeno je efikasno studiranje i savremeno obrazovanje geodetskih kadrova za potrebe struke i nauke. To potvrđuju stotine kvalitetnih inženjera s diplomom iz oblasti geodezije stečenom na Građevinskom fakultetu Univerziteta u Sarajevu, koji su se pokazali uspješnim stručnjacima i naučnicima, dajući svoj značajni doprinos geodetskom sektoru u Bosni i Hercegovini. Geodetski odsjek Građevinskog fakulteta Univerziteta u Sarajevu uvijek je predstavljao kolijevku moderne, naučnoistraživačke i obrazovne geodetske teorije i prakse, i to ne samo u okvirima Bosne i Hercegovine, nego i šire, jer su i mnogi izvan Bosne i Hercegovine ovdje sticali svoje diplome. Brojni su kvalitativni i kvantitativni pokazatelji koji svjedoče o dinamičnom razvoju Odsjeka, njegovom plodnom nastavnom i naučno-istraživačkom radu, od kojih ovdje samo navodimo da je tokom ovih pedeset godina diplomiralo 969 studenata, odbranjeno 8 magistarskih radova i 12 doktorskih disertacija. Odsjek je stasao u prepoznatljivo

središte i rasadnik proučavanja svih oblasti geodezije i na njemu se uspješno provodilo intelektualno i stručno formiranje budućih geodetskih kadrova, koji su se pokazali uspješnim stručnjacima i naučnicima, dajući svoj značajni doprinos geodetskom sektoru u Bosni i Hercegovini i drugim zemljama. Stoga jubilej nije samo značajna obljetnica ovog Odsjeka, Građevinskog fakulteta i Univerziteta u Sarajevu, nego predstavlja datum od prvorazrednog značaja u historiji razvoja geodezije u Bosni i Hercegovini i šire.

Aktivnosti na izradi ove monografije trajale su preko tri godine. Monografija je nastala na temelju sačuvane arhivske građe i drugih izvora te skromne relevantne literature. Ovo je prva publikacija u čijem je fokusu prezentacija univerzitetskog geodetskog obrazovanja u Sarajevu, od samih početaka 1949. godine pa sve do modernog Odsjeka za geodeziju i geoinformatiku. Osim prikaza historijata geodetskog studija, vrijednost monografiji daju i biografije svih uposlenih koji su na Građevinskom fakultetu predavali geodetske predmete, kao i biografije svih vanjskih saradnika, te popis svih studenata koji su završili studij, podaci o međuinstitucionalnoj i međunarodnoj saradnji, izdavačkoj djelatnosti, naučnoistraživačkom radu, itd. Monografija je pisana s namjerom da se popuni evidentna praznina u poznavanju naše visokoškolske geodetske obrazovne djelatnosti u prošlosti i da se iznimno geodetsko institucionalno naslijeđe Građevinskog fakulteta Univerziteta u Sarajevu zabilježi za buduće generacije. Velika želja autora je da se postignuti izvanredni rezultati bosanskohercegovačkog geodetskog obrazovanja sačuvaju od zaborava, te se u tom kontekstu izražava nada da će monografija pobuditi odgovarajuće zanimanje naučne, stručne i općenito šire kulturne javnosti.

Monografija je napisana pregledno, a njen opsežni sadržaj sistematski je podijeljen u 6 prikladnih poglavlja, u kojima se nalaze odgovarajuća podpoglavlja. Sadržaj je vrlo bogat i prezentiran na razumljiv način. Monografija "50 godina Odsjeka za geodeziju i geoinformatiku: 1973 - 2023" je tekstovno i slikovno izuzetno bogat, dubok i izuzetno zanimljiv pregled historijata studija geodezije na Građevinskom fakultetu Univerziteta u Sarajevu. Djelo sadrži neprocjenjive informacije o razvoju studijskih programa i univerzitetskog izučavanja geodezije, o pratećim okolnostima razvoja geodetske struke, geodetskoj tehnologiji i prije svega o ljudima koji su stvarali historiju studija geodezije i upisali se u historiju bosanskohercegovačke geodezije. Monografija svojim sadržajem predstavlja detaljnu i nadahnutu hroniku pola stoljeća, nevjerovatnu i jedinstvenu priču jednog specifičnog vremena. Djelo će na najbolji mogući način zauvijek zabilježiti prvih 50 godina studija geodezije na Univerzitetu u Sarajevu. Predstavlja temeljno djelo ne samo Odsjeka za geodeziju nego i cijelog fakulteta i može biti na ponos Fakultetu i Univerzitetu u Sarajevu.

Dušan Kogoj